

Permohonan PIDN JPA dibuka 3-7 Julai

15 Jun 2023 12:13pm Masa membaca: 1 minit



PUTRAJAYA - Pelajar yang sedang mengikuti pengajian di peringkat Ijazah Pertama boleh memohon penajaan Program Ijazah Dalam Negara (PIDN) di bawah Jabatan Perkhidmatan Awam (JPA), bermula 3 hingga 7 Julai bagi bidang perubatan, pergigian dan farmasi.

JPA dalam satu kenyataan pada Khamis memaklumkan bahawa, perkara itu susulan keputusan kerajaan untuk meneruskan program penajaan JPA dalam tiga bidang tersebut.

Menurut kenyataan JPA itu, ketiga-tiga bidang tersebut turut ditawarkan melalui Program Khas Lulusan Sijil Pelajaran Malaysia Dalam Negara (LSPM) kepada pelajar lulusan Sijil Pelajaran Malaysia Tahun 2022.

Tempoh permohonan bagi Program LSPM dilanjutkan sehingga 23 Jun 2023. Sebarang maklumat lanjut berkenaan perkara berkenaan boleh dirujuk di laman sesawang esilav2.jpa.gov.my.

Ahad lepas Perdana Menteri Datuk Seri Anwar Ibrahim dilaporkan memberi jaminan bahawa [JPA akan meneruskan pemberian biasiswa](#) kepada pelajar yang melanjutkan pengajian dalam bidang perubatan, pergigian dan farmasi.

Menurut Anwar keputusan menghentikan tajaan di bawah JPA, merupakan dasar kerajaan terdahulu. - Bernama